

# La'o Hamutuk

Institutu Timor-Leste ba Monitor no Analiza Dezenvolvimentu

Rua D. Alberto Ricardo da Silva, Bebora, Dili

Tel: +6703321040 Mobile:+67077234330

Email: [laohamutuk@gmail.com](mailto:laohamutuk@gmail.com) Website: [www.laohamutuk.org](http://www.laohamutuk.org)



## Kestionáriu ba Kandidatura Prezidente Repúblika periodu 2022 - 2027

### Resposta husi: Armanda Berta Dos Santos

1. *Saida mak ita boot nia vizaun estratéjiku ba dezenvolvimentu ekonómiku iha Timor-Leste iha tinan lima oin mai bainhira eleitu nudár Prezidente Repúblika? No Intervensaun saida de'it mak ita-boot sei halo atu realiza vizaun estratéjiku ida ne'e iha estadu?*

R: Nu'udar Prezidente Repúblika, ha'u sei fó hanoin ba governu hamosu insentivu ba autór sira (agrikultór no empreatariu) hodi duplika ka triplika produktu lokál ho kualidade internasionalmente bele kompete. Ha'u hatene serbisu ne'e todan no tenke integradu involve setór hotu (agrikultura, infraestrutura, kooperativa, turizmu, komérsiu no indústriia) atu iha asesu ba irrigasaun sira hodi halo natar no to'os nebe luan, hakiak animál ho eskala bo'ot (manu, bibi, fahi, karau), hakiak ikan, ai kameli ho kualidade diak, kafé diak liu iha mundu, nsst. Nune'e ita bele kontrola ekilibriu exportasaun ho importasaun no osan barak bele sirkula iha rai-laran. Fator sira importante liu atu dada investór mai timor mak: estabilidade ka seguransa, birokrasia ne'ebé simples, lei konaba rai halo-tuir no garantia Sistema bankária.

- *Oinsá ita boot nia estratéjia atu asegura direitu umanu, partisipasaun no representasaun fetu no ema marginalizada seluk iha ita nia demokrasia, iha ita nia rai rasik?*

R: Ha'u iha prinsípiu ida klaru maka 'tane o lisan, tane o emar no tane o rain', katak tane direitu umanu, sei la husik ema ida ba iha kotuk no oportunidade hanesan ba ema hotu tuir Sistema demokrasia RDTL nian. Ha'u sei sai inan ba povu no timor-oan tomak.

2. *Daudauk ne'e, maioria Timor-Leste nia povu mane, fetu no labarik sira seidauk hetan nutrisaun, edukasaun no saúde ho kualidade*

- *Sujestaun saida mak Prezidente sei fó ba governu no Primeiru Ministru no Ministru balun kuandu presiza?*

R: Hau sei husu atu governo sériu wainhira kaer ukun. Tanba xa?

a) Ministériu Saúde iha kna'ar serbisu hamutuk ho setór públiku ka ajensia internasionál atu kura no halo prevensaun ba malnutrisaun. Nasaun barak hasoru malnutrisaun maibé sira buka atu kura liu housi hanorin povu kuda no han hahán ne'ebé iha nutrisaun, fornese ai-hán wainhira sira kuran no fó mós aimoruk atu sira laran nakloke atu han. Tulun inan sira atu fó ai-hán nutritivu hahú sei bebé atu bo'ot mai sai sidadaun forte no matenek atu serbi ba nasaun. Fasilidade saude nakloke ba povu no ema tomak atu sira la bele moras. Tanba wainhira povu moras, nasaun mos moras,

ekonomia moras no buat hotu moras.

b) Ministériu Edukasaun iha kna'ar fó edukasaun ne'ebé tulun povu hatene moris mesak no la-dependente ba estadu ka ema seluk. Eskola Téknika Vokasionál barak mak la-iha laboratórium ka fatin no materiál atu estudante sira prátika? Ne'e Ministru nia seriedade iha ne'ebé? Ema barak mai ita nia rain buka industria maibe la-iha. Atensaun ba professor sira nia empenamentu hahú hosi Jardim infansia to'o Sekundáriu mak xave atu determina kualidade edukasaun? Maibé, wainhira tama Universidade Dosente seidak hatene koalia portugues/ingles ka seidak hatene pratika tuir área Enjinaria tanba ita la-hatene mai husi universidade ida ne'ebé?

- *Iha ka lae kompeténsia seluk, alende veta no promulga lei ne'ebé aprova iha Parlamentu, liu-liu hodi haree ba asuntu hirak ne'e?*

R: Komunikaun entre orgaun estadu bele sai kanál efetivu liu atu fó hanoin malu nafatin saida mak diak ba povu nia moris diak. Liu-liu ho orgaun ezeutivu eh governu.

- *Asaun saida mak efetivu liu Prezidente bele foti hodi hetan solusaun ba problema sira ami temi iha leten ne'e?*

R: Prezidente bele husu governu halo kooperasaun iha área relevante balu ho nasaun viziñu ka nasaun ne'ebé konkorda ona wainhira vizita ofisiál. Nu'udar matan, tilun no ibun povu nian, ha'u sei alerta nafatin governu atu tau matan ba povo nia moris diak.

3. *Tinan hira ikus hafoin 2012 Timor-Leste nia reseita husi mina no gás tun-sa'e ba kondisaun ne'ebé ita labele kontrola. Maske Timor-Leste nia kampu mina Bayu Undan sei remata iha tinan ida ka rua, no kampu Greater Sunrise iha duvida komersiál, setór produtivu sira hanesan agrikultura, indústria transformadóra sira no turizmu seidak iha kreximentu.*

- *Oinsá Timor-Leste bele muda husi dependénsia esportasaun ba mina, gás, no minerais ba dalan sustentável liu?*

R: Timor-Leste sei iha rekursu seluk tan ne'ebé bele hatutan ekonomia no la-depende deit ba mina-rai no gás. Ita rona ona dala barak estudu halo maibé seidak realiza. Ita tenke kria kondisoin diak atu atrai investór sira mai investe hodi explora riku-soin sira non mina no gás. Prezidente sei hamri'ik hamutuk ho povo tomak husu orgaun ezeutivu hala'o nia kna'ar ho seriedade atu lori ita ba moris diak. Kore povo hosi kiak no mukit.

- *Polítika ka sujestaun saida mak Ita-Boot sei kontribui atu hasa'e ekonomia Timor-Leste no sustenta finansas estadu bainhira mina-rai sei maran?*

R: Buat balu ha'u temi ona, katak setór non mina no gás mak tenke sai prioridade atu desenvolve ho sistematiku. Katak simples liu: hakarak hakiak ikan be midar no halo natar – irigasaun tenke funsiona ho diak, makina tenke operasionál, espesialista tenke hetan asisténsia nafatin hosi Ministériu Agrikultura no Peskas, kompradór pruntu atu serbisu hamtuk ho exportadór ka importadór, Estrada no meius komunikaun diak; Hakrak hakiak animál – insentivu diak ba agrikultór ka empreza, iha fatin diak, aprende

Sistema hakiak no oin xa fó han no kuidadu atu hetan kualidade diak, doutór animál pronto fó assisténsia, kompradór iha no bele fan iha merkadu. Governu tenke haré ne'e ho fuan katak ne'e hotu ba deit moris diak povu nian.

4. *Dékada rua Timor oan restaura nian independénsia, felismente ita laiha tan funu, tratamentu kruél no desaperesimentu forsadu. Esforsu saida mak ita-boot bele kontribui hodi ajuda hakotu impunidade ba krime grave durante okupasaun Indonézia nian? No iha Relatóriu Chega! rekomenda atu comunidade internasionál liu-liu Nasaun sira no kompañia sira inklui atór sira prezisa fó reparasaun ba estragu ne'ebé iha durante funu. Ita-boot sei halo esforsu ruma atu asegura diretu ida ne'e ba sobrevivénte sira?*

R: Nu'udar ita hotu hatene kata Timor-oan tomak mesak sobrevivente. Prosesu nahe biti bo'ot, Comissão Amizade Verdade e Reconciliação – CAVR, Comissão Verdade e Amizade - CVA no ikus mai prodúz relatóriu CHEGA rekoñese konsekuénsia moruk funu nian maibé hatu'ur valór amizade a'az liu atu hateke ba oin hodi kombaté no hasai povo hosi kiak no mukit. Nu'udar Prezidente, ha'u sei buka atu ema hotu respeita malu ho prinsípiu domin ka amizade atu bele kore-an housi moris kiak no mukit. História moruk ita hotu nian sei halo berani liu hamutuk hari no hafutar ita rain atu loron ida sai hanesan rai seluk-seluk ka nasaun seluk.

5. *Liga ba Artigu 87. (Kompeténsia kona-ba relasaun internasionál) daudauk ne'e funu entre Rúsia no Ukránia, iha semana rua liu ba Rúsia halo invazaun kontra Ukránia. Husi atake ida ne'e, rezulta ona ema barak mate, estraga infrastrutura barak iha territóriu Ukránia nian no ema liu tokon ida ho balun (1,500,000) mak hasai sai ona husi Ukránia. Nudár Prezidente Repúblika, saida mak ita boot sei halo hodi kontribui pás iha mundu, no asegura relasaun di'ak entre nasaun hotu?*

R: Nu'udar país sobernu ida ne'ebé uluk terus funu no mate barak iha invazaun nia okos, ita hatene katak povo Ukrania terus. Ita sei apela liu housi Sistema Nasoin Unidas nian atu ema hotu tenke respeita direitu internasionál. Funu lori deit destruisaun no violasaun direitus humanus, tanba ne'e, ita kondena funu.

6. *Tinan hirak ikus ne'e, Governu koko introdús lei krime sibernetika no kriminaliza defamasaun, ida ne'e iha poténsia ba limite liberdade imprensa no espresaun, ita-boot sei iha esforsu ruma atu asegura liberdade ema nian ba espresa no imprensa, inklui iha media sosiál? Oinsá ita boot bele enkoraja Timor-oan sira hotu atu rona ba malu?*

R: Dala ida tan ha'u dehan katak "tane o lisan, tane o emar no tane o rain" mak dalan diak atu ita respeitu malu ka tane malu. Facebook atu komunika malu laos insulta malu, ki'ik respeita bo'ot, feto no labarik tuir edukasaun hosi uma laran kedas. Ha'u sei buka atu ko'alia nafatin ho ema hotu. Obrigado wain